


TEZAU LITURGIC
12 MARTIE

ACATISTUL
SF. PREOT-MUCENIC
SERGHIE
SKVORTOV
DE LA DREZNE



MOSCOVA, 2000



Акафист

священномученику Сергию

Скворцову, Дрезденскому

Кондак 1

Избранный подвижнице и истинный сыне Церкви Русския, изрядный угоднице и твердый исповеднице Христов, богоблаженне отче наш Сергие! Почитаем тя любовью и похвальная восписуем ти: ты бо в заточении неотступно пребыл еси верен Христу, в скорбех, тесноте и гонениях благодаривый Бога. Не престай молиться, поминая чад твоих, да спасет Господь взывающих и поющих ти:

Радуйся, священномучениче Сергие, теплый молитвенниче о душах наших.

Икос 1

Ангелов Творец и всея твари Создатель избра ты во дни смут и нестроений церковных, святой отче Сергие, в проповедника Православия среди народа от веры отступавшего Ты же, яко добрый воин Христов, Креста оружием вооруженный, со

усердием провозвещал еси учение Спасителя Нашего, за Него же многия страдания смиренне претерпевши, венцем мученическим украсился еси на небесех, идеже молишися о всех, взывающих ти сице:

Радуйся, всем сердцем и всем помышлением твоим Бога возлюбивый;

Радуйся, за веру и Отечество живот свой положивый;

Радуйся, царствия Христова сонаследниче;

Радуйся, славы Божия сопричастниче;

Радуйся, Спасителя возлюбивших покровителю;

Радуйся, кающихся с Богом примирителю;

Радуйся, чтущих память твою пред Богом поминающий;

Радуйся, о прославляющих тя Господа умоляющий;

Радуйся, священномучениче Сергие, теплый молитвенниче о душах наших.

Кондак 2

Видя благое изволение сердца твоего, Пастыреначальник Господь наш Иисус Христос

благодать священства дарова тебе, благоговейно восприим, священник непорочен Бога Вседержителя явился еси, вопия Ему в молитве и дерзновении мнозе: Аллилуиа.

Икос 2

Разумом ти Свыше данным, богомудре Сергие, о душах чад Христовых усердное попечение имевый, темже убо ограждая их от ереси и раскола, поученьми твоими веру истинную в сердцах их насаждал еси. Мы же, ведуще тя о спасении нас тако пекущаяся, с любовью вопием ти:

Радуйся, друже Божий, крест Христов доблестне носивый.

Радуйся, любимого Господа лик пресветлый видети сподобивыйся;

Радуйся, усердно у престола Божия о нас молящийся

Радуйся, земли московския славо и украшение.

Радуйся, веры православной утверждение.

Радуйся, сирых и обездоленных защищение.

Радуйся, нуждным и отягощенным неложное
вспоможение;

Радуйся, скорбящим и обуреваемым присное
утешение.

Радуйся, священномучениче Сергие, теплый
молитвенниче о душах наших.

Кондак 3

Промыслом Божиим во граде Дрездне
просиял еси, преславный Сергие, идеже паству
свою молитвами, яко орел птенцы своя крилами
покрывал еси, выну очима ума своего Крест
Христов созерцая, скорбных и печальных
утешал еси, укрепляющему же тя благодатию
своею Всемогущему и Милосердному Господу
воспевая: Аллилуйя.

Икос 3

Имеяй любы нелицемерную, предал еси всего
себе Создателю вышних и нижних Искупителю и
был еси помощник страждущим в недугех,
утешитель скорбящих, путеводитель заблудших
в море житейских попечений, алчущих истины
питатель, младенствующим в добродетели
наставник, вопиющих таковая:

Радуйся, сеятелю слова Христова усердный;

Радуйся, молитвенниче о пасомых
прилежный.

Радуйся, наставлением в законе Господнем
отроки вразумивый;

Радуйся, безсребренниче, вся земная
стяжания презревай.

Радуйся, плод духовный собравый;

Радуйся, любви, радость, мир, долготерпение
стяжавый.

Радуйся, яко воин Господень был еси;

Радуйся, яко плоть свою со страстями и
похотями распял еси.

Радуйся, воздержание выну имевый;

Радуйся, священномучениче Сергие, теплый
молитвенниче о душах наших.

Кондак 4

Бури житейских бед и напастей не
возмогша поколебати крепости души твоея,
преславный Сергие, основана бо бе на твердем
веры Христовы камени. Мы же, дивящиеся
великому терпению твоему, со умилением
взываем Богу: Аллилуиа.

Икос 4

Слышав непрестанно глас Божий в сердце твоём, блаженне отче Сергие, добротою души твоея к людем просиял еси, всего себе на служение пастве своей отдавая. Благодетелии же людие, видяще в тебе доброго пастыря и учителя, с радостию притекаху к тебе и велие утешение и ослабу в скорбех своих по молитве твоей приимаху. Мы же, прославляя Господа, давшего ти таковую благодать, приносим тебе сицевая:

Радуйся, пастырю благий, смиренный и кроткий.

Радуйся, земли московския славо и украшение.

Радуйся, веры православной утверждение.

Радуйся, сирых и обездоленных защищение.

Радуйся, самоотвержение всецелое показавый;

Радуйся, спасение многих взыскавый.

Радуйся, яко волков хищных от паствы твоея отгнал еси;

Радуйся, яко коварство их мудро распознал еси.

Радуйся, священномучениче Сергие, теплый молитвенниче о душах наших.

Кондак 5

Боготечней звезде уподобился еси, угодниче Божий Сергие, указуя спасительный путь во тьме греховней блуждающим, светом заповедей Христовых всех просвещая и вразумляя, добрых сердца в Православии утверждая, ленивых и нерадивых присно воздвизая к пению Богу: Аллилуиа.

Икос 5

Видим тя, прехвальне Сергие, очами веры у престола Божьего предстоящего и за нас, грешных молящегося и твоим заступлением обретая в скорбех – утешение; в недугех – исцеление; в бедах – скорое вспоможение, величаем возвеличившего тя Царя Славы Христа; тебе же, теплому предстателю нашему от любви сердечныя вопием:

Радуйся, в неизреченной славе Творца мира созерцающий!

Радуйся, во благоухании святыни присно
почивающий!

Радуйся, ангелов сожителю и святых
сомолитвенниче!

Радуйся, вся благая прошения наша
исполняющий!

Радуйся, от плевел ненависти сердца наша
очищающий!

Радуйся, светом любви нелицемерная нас
озаряющий!

Радуйся, старых в изнеможении укрепление!

Радуйся, юных в благочестии утверждение!

Радуйся, священномучениче Сергие, теплый
молитвенниче о душах наших.

Кондак 6

Проповедником добродетелей христианских
был еси, священномучениче Сергие, поучая
любить братию и народ свой. Мы же ублажаем
те, яко доброго и истинного последователя
Христового, живот свой за люди твоя
положившаго, воспевая Господеви песнь:
Аллилуиа.

Икос 6

Возсиял еси во граде Дрездне, всехвальный Сергие, души верных озаряя и тьму безбожия разгоняя. Просвещал еси паству свою светом Евангелия Христова. Ты с ревностию учил еси о вере Православной, обличал еси пороки людския очищая от суеверия и лености, оберегая от неверия, нечестия века сего. Сего ради и мы в дни скорби блуждания греховнаго, припадаем к тебе, угодниче Божий, слезно взывая: буди в жизни нам вождь добрый и благонадежный, да не престанем величати тя сице:

Радуйся, каменю драгий, землю нашу всю украшая.

Радуйся, от потопления бурями житейскими правоверных спасаая;

Радуйся, унывающих и мятущихся укрепляя и от заблуждения отревая.

Радуйся, теплотою любви твоея наша хладная сердца согревающий

Радуйся, козни вражия предстательством твоим разрушающий.

Радуйся, сладостию молитв твоих скорби наша растворяющий;

Радуйся, к свету Христову заблудшия наставляющий.

Радуйся, упованию христианскому верныя научающий

Радуйся, священномучениче Сергие, теплый молитвенниче о душах наших.

Кондак 7

Хотяще явити миру источники милости своея неоскудевающия, Христе Боже наш, даровал еси нам предстателей и молитвенников к тебе дерзновенных святых твоих новомучеников, иже твердость веры своея, даже до крове пострадавши засвидетельствоваша; В нихже Тя, Единого Благаго Бога славяще, умильно зовем Тебе: Аллилуия.

Икос 7

Новую благодать дарует Господь страждущему народу нашему, в горниле испытаний лютых смертельно изнемогшему, да уразумеем яко благ Господь, наказует, но не умерщвляет, показуя на избранных Своих, вчера униженных и обесславленных, ныне их Церковь святая к лику святых воздвизает. С ними же ты, священномучениче Сергие, в чертог Свой

приемлет молиться за ны. Сего ради радуящися,
вопием Ти:

Радуйся, сладость словес Господних в сердце
всегда хранивый;

Радуйся, игу благому Христову самого себе
всецело подклонивый.

Радуйся, иерейския благодати пред Богом не
посрамивый;

Радуйся, данный тебе талант добродетельми
преумноживый.

Радуйся, стадо Христово, мечем веры от
неверия оградивый

Радуйся, образ терпения и себе отречения
добльственне явивый.

Радуйся, образ страдания и любви ко Господу
нам являй;

Радуйся, на узкий путь спасения нас
наставляй.

Радуйся, священномучениче Сергие, теплый
молитвенниче о душах наших.

Кондак 8

Странно и уязвленно бе слышати
проповедание Евангелия Христоваго

обкраденных умом, святой Сергие, тобою проповеданного. Ты же, любовью ко Христу пламенея и взирая на страдания Его, и на сраспинавшихся за Истину благочестия Евангельскаго, безбоязненно призывал еси паству свою: имети совесть незазорную и любите друг друга, якоже Господь возлюбил нас, во еже, не токмо zde, но и в селении праведных, милостиво сподобимся воспевати творцу нашему: Аллилуиа.

Икос 8

Весь исполнен любви Христовы, священномучениче Сергие, яко пастырь добрый ему же суть овцы своя, видево волка грядуща, не оставил еси их и не бегал еси, но пред ними ходил во всеоружии силы и истины даже до смерти от богоборцев. Ныне же ты яко Ангел - хранитель православным христианом града Дрездны пребываеши и молитвы о них возносиши ко престолу Вседержителя. Мы же, усердно светлую память твою почитая, с верою, надеждою и любовью воспеваем ти сице:

Радуйся, стези правы ногама своима прошедый;

Радуйся, Спасителя пред людьми
исповедавший;

Радуйся, нищетою Христовою обогативыйся.

Радуйся, служение беспорочно совершивый;

Радуйся, святою ревностию о спасении
паствы твоея пламеневый.

Радуйся, возжещи сию ревность в чадах
твоих восхотевый;

Радуйся, боязни и страха человеческого не
ведавый.

Радуйся, пастырю, душу за овцы твоя
полагавый;

Радуйся, наемником лукавым паствы твоея
расхитити не давый

Радуйся, священномучениче Сергие, теплый
молитвенниче о душах наших.

Кондак 9

Всякие труды подъял еси, отче наш Сергие,
всякие лишения, обиды и болезни претерпел еси
ради паствы твоея. Егда открыся гонение на
православных, враги устремились на тя,
ищущие души твоея, уповая на Всемудраго
Господа нашего, глагола еси: мне еже жити

Христос, и смерть приобретение. Сего ради вся находящая ти скорби сладце терпел еси, рассуждая, яко недостойны суть страсти века сего хотящей явиться в нас славе, воспевая Богу: Аллилуиа.

Икос 9

Ветия многовещанная не возмогут по достоянию воспети страдания твоя за Христа, всехвальный священномучениче, яко николиже возроптал еси, поминающе глаголы Господни: «Блажени есте, егда поносят вам, и ижденут, и рекут всяк зол глагол, на вы ажуще Мене ради, радуйтесь и веселитесь, яко мзда ваша многа на небесех». Мы же, сии глаголы почитающе, славим подвиг исповедничества твоего и вопием ти сице:

Радуйся, временная жизни покой, правды Божия ради презревай.

Радуйся, за Христа узы и темницу всерадостно приявай.

Радуйся, истинную радость во страданиях о Господе обретавый;

Радуйся, томления и труды тяжки в
заточении от злочестивых богоотступников
претерпевый;

Радуйся, всем сердцем твоим возлюбивый
Христа, и вся до конца за того претерпевый;

Радуйся, безпреткновенно во обители горняя
душею возлелевый.

Радуйся, всем житием твоим и кончиною
праведною Бога прославивый;

Радуйся, священную память твою на земли
нам оставивый.

Радуйся, священномучениче Сергие, теплый
молитвенниче о душах наших.

Кондак 10

Спаستися хотяй всем человекам, иже на
крове мучеников Своих Церковь основавый,
сердцеведец Христос положи тя, отче наш
Сергие, в сонме святых новомучеников во
основание храмины страны Российския, да вси
в ней сущия вопиют Богу: Аллилуиа.

Икос 10

Стену небориму стяжал еси благодать
Господню, отче наш Сергие, защищающую тя от

враг невидимых, не могущих души твоея погубити: достойна бо тоя благодати явился еси богоугодными труды твоими и умиленными молитвами и велиим упованием на Распятого Спасителя, веровал бо еси несомненно, яко смерть тела не есть конец, что Сам Христос есть путь в святыне веры и в лице Своем - истина, и в таинствах благодатных, и в существе своем - жизнь безконечная. Мы же, неизреченное величие любви твоея к Богу воспеваем и велией вере твоей подражати желая, таковыя похвалы смиренне приносим ти:

Радуйся, во испытаниях своих веру крепку, яко Авраам, явивый;

Радуйся, в злостраданиях терпение твердое, яко Иов, показавый;

Радуйся, не суетному унынию, но Божьему благоволению себе предавый;

Радуйся, Христу Богу в кротости и смирении подражавый;

Радуйся, житие свое тесною стезею мучений и страданий прошедый.

Радуйся, стратотерпче, Христа безстрашно исповедавый;

Радуйся, боязни и страха человеческого не ведавый.

Радуйся, пастырю, душу за овцы твоя полагавый;

Радуйся, священномучениче Сергие, теплый молитвенниче о душах наших.

Кондак 11

Пение умиленное приносим ти, священномучениче Сергие, прославляюще твоя за Христа страдания и молим тя: испроси нам у Господа нашего Иисуса Христа крепко в вере истинней стояти, козней злолукавых избегати и с тобою купно воспевати: Аллилуиа.

Икос 11

Светоносен светильник во тьме безумия и мраце беззакония горяй, воистину явился еси, прехвальне отче наш Сергие, егда кротце последовал еси на страдание, уготованное ти от мучителей, ты бо узах суще, от гонителей веры Христовой оскорбления и иныя муки душевныя, надругания, заушение и лютыя биения незлобливе приял еси, в полуденном крае заключение свое до самыя кончины твоея отбывая. Сего ради покланяющся

Всемилоствому Богу, воспеваем тя, единого от добропобедных страстотерпец Его, хвалении таковыми:

Радуйся, веры христианския исповедниче неустрашимый.

Радуйся, воине Христов в терпении твоём непобедимый.

Радуйся, благонадежный помощниче всем за истину терпящим.

Радуйся, яко милость Божию твоими молитвами изливаеши.

Радуйся, яко своим предстательством от бед избавляеши.

Радуйся, яко плачущих и страждущих с любовью утешаеши.

Радуйся, яко в райских обителях ныне пребываеши.

Радуйся, яко с высоты небесной нас назираеши.

Радуйся, священномучениче Сергие, теплый молитвенниче о душах наших.

Кондак 12

Благодать божественную испроси нам, мучениче Христов, много бо может молитва твоя ко благосердию Владыки, не возгнушайся наша греховная нечистоты, но буди нам во всем помощник и к покаянию благий наставник, научая милующему нас Богу воспевати: Аллилуиа.

Икос 12

Поюще песнь благодарения Всещедрому и Человеколюбцу Богу, прославльшему тя, яко верного исповедника Церкви Русския, ублажаем болезни и труды твоя, имиже во славу Божию поработал еси, восхваляем подвиги твоя, яже за Христа претерпети сподобился еси, почитаем пастырскую кротость и смирение твое, яко добре упасл еси чада твоя, и воспеваем тя хваленьми сицевыми:

Радуйся, за Христа на земли страдавший и со Христом на небеси царствующий;

Радуйся, с высоты небесная милостивно на нас, недостойных, призирающий.

Радуйся, похвалы наша, аще и недостойнии вас, благосердно приемлющий;

Радуйся, молитвам нашим, аще и немощным,
с любовью внемлющий.

Радуйся, от всея души и сердца возносимая к
вам прошения наша исполняющий;

Радуйся, во всех нуждах, бедах и обстояниях
нам помогающий.

Радуйся, вражды и ссоры наша
умиротворяющий;

Радуйся, всякий мрак заблуждения от нас
прогоняющий.

Радуйся, священномучениче Сергие, теплый
молитвенниче о душах наших.

Кондак 13

О преславный пастырю, священномучениче
Сергие! Приими ныне от нас грешных
похвальное пение сие, и твоими святыми
молитвами поющих тя в мире сохрани, в вере
правой утверди, от бед и напастей избави,
скорбь пути многобедственного жития нашего в
радость претвори, да совершивше поприще
своего спасения, сподобимся Христу Богу
предстать и вкупе с тобою в селениях райских
воспевати: Аллилуиа. (Этот Кондак читается
трижды)